


粵中見聞

三十一之五

六止




漢書門			
二	三	七	七
九	一	函	號
六	三	架	冊

內閣文庫			
二	三	七	七
九	一	函	號
六	三	架	冊

內閣文庫		
番號	漢	2377
冊數	6	(6)
函號	232	73





粵中見聞卷三十

物部十

松

梅嶺多松大者十餘抱枝柯百尋裊裊若藤蘿下垂而多
倒折葉黝黑望如陰雲夾道有數百株皆張文獻手植者
羅浮七星壇下舊有七星松甚怪嘗化為劍客從道士鄒
葆光入朝見帝于凝仙殿又化道士七人往來山下瓊州
無松惟海忠介植數株於其祖墓今尚存蓋松性宜寒瓊
州極南地氣太熱故松植之不生也

淺草文庫

水松

廣中平陂曲岸多植水松水松者櫻也喜生水旁其根浸漬水中輒生鬚鬣孃孃下垂葉清甜可食子甚香又嘗有木生其旁萃起于地與六相抱名曰抱木甚香質柔弱不勝刀鋸乘濕時刻而為履易如削瓜既乾則韌不可理矣在粵不大香踰嶺乃殊勝北人甚貴重云

柏

萬木皆向陽而柏獨西向字又從白金之木也有二種刺柏葉圓尖細質赤難長難萎無花實木堪作香扁柏葉扁

質白易長易萎作花結實廣州婦女常於霜降後采柏子仁浸油膏髮潤澤而黑潮陽多紫柏木香而文可為器生別地者歲久多空心

楓

楓多生山谷性喜風風去而樹聲不止異于眾木故謂之楓霜下則葉深紅其脂然之可解痘毒楓者風之所聚有瘦則風神依之曰楓子鬼稽含云楓老有瘦中夜大雷雨瘦即暗長一枝長可數尺形如人口眼悉具謂之楓人粵巫取之作術往往有神

榕

榕葉茂盛幹多中空不堅無花有子子可飽魚其脂乳可貼金接物其細根槌練曝乾爲火索風雨不滅幹及三人圍抱則枝上生根連綿拂地得水土之力根又生枝成幹且可倒插入土卽活以枝爲根轉以根爲枝樹易高大粵人多植作風水而其地亦必興焉烏啣榕子寄生他樹歲久根下至地易至合抱其樹反若寄生于榕性畏寒踰梅嶺則不生故紅梅驛有數榕爲炎塞之界封川縣西三十里分界兩粵同日植一榕相去三丈許東大西小東榮西

瘁東榕又不落葉咫尺間地分寒煖如此自韶州西北行榕多直出不甚高與廣州榕異高州途中榕多成陰新興東北一帶亦有之宋延祐年間有知新州倉振者夾道種榕後有高芝又種松行旅歌曰倉榕高松手澤重重高松倉榕夾道陰濃僉事劉公諱洵修高倉故事自高要南岸至新興着里胥分地植榕遣官以時驗勤惰至今榕樹存者大十圍昔歸善葉公春及知惠安縣亦着民自白水至雒陽植榕四百二十一本以蔭馳道皆仁人之澤也榕火樹多空心濕熱鬱久每發烟燄韶州城中古榕吐烟卽有

兵革劉香寇廣州時南海縣治有古榕白晝騰烟彌日陰符經謂火生於木禍發必克物殆云吉也不月餘劉香平前壬午樂昌至善寺古榕火起如焚膏三日乃盡又癸未高州府署榕烟接天丙戌之臘清遠城隍廟榕出白烟三日次年二月晏公廟又與城隍廟並出烟二日其秋卽有屠城之禍榕皆先報休咎也東莞城西上清觀有榕五株傳云昔有道士其妻戲以雷印擊案忽有雷神五來止庭前適遇道士歸乃言觀前無樹吾召雷欲移數大樹以蔭山門須與風雨大作有巨榕五株列植觀前至今猶存龍

門縣油田舖有兩榕相去數丈其上枝葉繆結根幹所出結成一門下通車馬往來宋時物也

椀

椀名大葉榕木質粗疎葉初發若辛夷蕾葉開則色殷紅望之如花此樹無花葉卽其花葉至冬而盡落春間乃發初發似筆管粵人謂之管樹廣城舊屯田道署有一椀樹大數十抱其樹腹舊有一碑兵婦得之搗衣石聲清越有聞其聲者向取視之乃前屯田副使李默所撰孤樹哀談記也

槐

葉大而黑者名懷槐葉晝合夜開者名守宮槐初生嫩芽
摘晒乾可代茶花煎汁染黃色甚鮮明子名槐角內外痔
瘡可治亦療赤痢與花同功廣州世冑家門庭多植此樹
才女劉蘭雪咏槐花詩淺翠輕黃何處尋王公庭下列森
森夕陽蟬噪西風急布就祗園大地金

相思

昔有女子望夫于樹下淚盡出血染樹結成子遂以名其
樹大數圍葉如槐其花似蓮而小色白中有紅心一縷結

莢如荳夏月子熟如荳紅色收藏二三年不壞亦不變色
山村女兒或以飾首間有售于嶺外唐時進御以藏冰片
不消滅又一名紅荳木性耐土斜鋸之有細花雲近皮數
寸無之又一種可飼鸚鵡者蔓生籬間生子細如菘荳朱
裳黑喙結實甚繁亦名相思子

棟

棟樹最易生長三四月開花紅紫色雄者不結實雌者結
實苦不可食童謠云荔支好食不生子苦棟無甘墜折枝
花可入香蘇東坡云溫成皇后閣中香不用沉檀龍麝只

用苦楝花松子膜荔枝皮而已

菩提

廣州光孝寺有菩提樹蕭梁時智藥三藏自西竺攜來大將百圍作三四大柯其根不生于本而生於枝根自上倒垂以千百計大者合抱小者拱把根包其幹惟見根而不見幹幹已空中無幹根卽其幹枝亦空中無枝根卽其枝其葉似桑桑而大本圓末銳二月凋落五月新生僧采之浸以寒泉至于四旬之久出而洗濯盡去渣滓惟剩細筋如絲霏微蕩漾以作燈帷笠帽輕清可愛持贈比于綃縠

也

泡木

泡木千百成行出於江海墘沙水間乃無始以前之木質不朽爛火之不然漁人斲以繫罟網取其性最浮水也肇慶多有之

海南文木

海南瓊州地居離位積陽之極人多文明物多華麗故其所產木堅而文有曰花欄者色紫紅微香其文有鬼面者佳以多如狸斑又名花狸老則文拳曲嫩者文直其節花

暈如錢大小相錯堅理密緻往往寄生樹上黎人方能識
取文昌陵水所產竟與降真香相類有曰雞翅木白質黑
章如雞翅絕不生蟲匠人車作素珠或以伽南液澤之以
騙人有曰虎翅木文如虎斑俱文昌陵水所產有曰蘇方
木汁紅可以染絳黎山野生者良有曰鐵索木質堅皮黃
剝落時如榆可爲器皿黎山爲多有曰香枏產崖州其樹
亭擢而上枝枝相避葉葉相讓幹甚端偉一名端正樹木
色黃綠細膩多花紋剖之香辣有金釵紫貝之名金釵色
黃赤紫貝黃中帶綠皆香辣細潤有紫檀一名紫榆來自

番舶以輕重爲價有曰鐵力木理甚堅緻質初畧黃用之
則黑南風天出水作成器濃煎蘇木水染之次以漆精薄
塗之光瑩如紫檀亦不出水有曰海棗俗多紫京堅重過
鐵力木且耐風雨入水不朽有曰秋風木類梓生子數十
成芄味酸甜可食有曰臙脂木樹高三四丈葉似波羅木
色紅艷性皆耐土不易朽有曰棕根葉俱似桃而膚理輕
細油膩性耐水有曰水沙葉如羅漢松膚理細潤亦耐水
不易朽有曰水椰其葉似魚子蘭稍尖木質有文如牛角
者佳有曰櫨性堅而理疎有曰金絲標可爲弩其白標如

象牙可為器皿性最韌有曰椅一名雲楸琵琶棋枰多用之有吐珠木堅如鐵力色比紫京較赤此皆海南文木也

粵中見聞卷三十一

物部十一

孔雀

孔雀南越之鳥孔大也孔雀生深山喬木上高三四尺通身金暈五色層疊如錦錢隆背細頸口丹黃輔有三彩毛在頂參差直上長三四寸其文尤在尾尾有大小者成以三年大者五年莖長四五尺珠毛相串翹翹然若順風揚麾而其色多變紅黃不定其金翠以春初而生花萼榮則金翠盛春暮花萼凋金翠亦衰蓋草木之精華聚焉性

最畏雨雨則金翠損壞猶花萼之忌沾濕也其棲宿必擇
置尾之所雨至猶珍顧不肯騫舉寧陷羅網不欲傷其羽
毛孕以音或以影相接音則以風風之上下其雌雄鳴必
隨之鳴曰都護聲必三三聲而其精已傳精之傳以風是
謂風化亦曰風胎凡鶴以聲交鶴以影接而孔雀兼之人
謂孔雀與蛇交大謬也食竹實亦食稻穀予嘗畜其二如
畜家雞然性最喜彩色兒童衣錦綺與戲或拍其尾則與
兒童對舞聞其尤喜對美人美人鼓掌或彈指則應節起
舞粵人謂其舞曰開屏賓客盛衣冠至則開屏似解人性

者易經離為雉南方離也故多雉孔雀雉之大者也白鷓
雉之皎潔者也雉以文明為尚文明在于冠帶粵多冠帶
之鳥冠之高者孔雀美者白鸚鵡戴勝官鵠白鸚鵡頂毛
每開則內黃外白如千瓣芙蓉戴勝色灰綠頭有髻高六
七分雄曰丁髻郎雌曰丁髻娘官鵠喙距皆紅身五采頂
有纓碧綠色山谷羣鳥附之謂之山判官帶之長者白練
山喜鵲山喜鵲身藍嘴紅面臆皆黑尾甚長如兩白帶飛
則骨掛樹間綬之華者孝鷓身有珠點文能反哺故稱孝
鷓春夏天晴氣爽則鼓翅而舞口中出物如錦綺長數寸

漸長覆胸燦然眩目頃之漸收入喉內剖之無所有也有
錦囊在胸前具五色一名錦帶功曹越鳥有三客孔雀曰
南客白鷗曰閑客鷓鴣曰越客古詩云越鳥巢南枝謂三
客也

鵲鱸

蒙童一名越王鳥羅浮有之山疏云越王鳥似鸞大如孔
雀有黃白黑三色喙長尺許口句末可受二升許南人以
為酒爵勝於文螺其性近于仁不踐地不飲江湖不啜百
草不餌蟲魚惟噉楓楠諸木葉故其糞香似薰陸山人以

為香末又治雜瘡有山鳳凰大如鵝鴈伏卵時雄者以木
枝雜山桃膠封其雌于巢而留一竅雄飛求食以飼之子
成拆開其封否則塞竅殺之此則鳥之不仁者也

白鷗

白鷗亦越鳥即白雉也白質黑文喙丹雄者有朱冠背純
白腹有黑毛尾長二三尺時啣之以自矜神貌清閒不與
眾鳥雜故曰鷗耿介自持摯而有別雌雄匹處不相戲狎
常谷谷若擊木魚聲幽靜可聽暮棲枝上則雄上雌下類
有禮者雌多朱毛白中由朱而變為純白俱以黑為邊欄

焉

鶴

嶺南之鶴皆灰色純白者則小去頂二寸餘毛始丹亦能
鳴舞有水鶴亦小狀類百鷺其性通風雨有風雨則鳴而
上山否則鳴而下海尋常多在榕樹

鷓鴣

鷓鴣隨陽越雉也飛必向日日在南故常向南雖東西迴
翔而命翮之始必南翥其志懷南亦曰南客飛數必隨月
正月一飛而止十二月則十二飛而止性畏霜露早暮有

霜露則不飛飛必啣木葉以自蔽霜露微沾其背則聲啞
天寒卽口鈴煖必對啼連轉數音一雄常挾數雌各占一
嶺相呼相應以爲娛有侵其地者則鬪獵人以囹誘之鷓
鴣聞囹聲以爲據其丘阜亟歸與鬪遂陷網中畜久可馴
然不鳴鳴必叢林中鳴曰行不得也哥哥聲最悲切聞之
多爲墮淚

山鵝畫眉

山鵝青紫畫眉紅綠形色小異而性情相同畜之雌雄必
異其筭異之則弄聲相喚同則否異之則雄見雄雌見雌

必隔笈而鬪慮其雄其雌之爲所奪也同則否鳥之最妬而鬪因乎色者也山鵠鐵脚眼赤而突者善鬪臆間有黑毛一片圓小而長者善鳴雄尾長音亦長雌尾短音亦短性善棲水常調其音與流波相應以自娛畫眉兩眉特白其眉長而不亂者善鳴胸毛短者善鬪鬪至三四百合勝者羽毛不動曼聲長引以鳴得意敗則羽毛鬆鬆伏而無響矣晝離之夜必合之合之則四羽相交屈首垂尾團團然雌雄莫辨獨寐則畏寒苦憶不能久活性善棲山常調其聲與巖石相應以自娛畫眉性燥山鵠性靜較易畜畜

之二鳥皆須多浴使毛羽光澤身不生蟊則音流麗欲其善鳴以生雞子青調米飼之欲其善鬪以馬螳螂蚱蜢兼嚼肉飯飼之翁源有畫眉村以多畫眉鳥故名亦貴之也

鶴鶉

鶴鶉形相似鶴色黑無斑始由鼠化終復爲鼠夏有冬無毛有斑點始由蝦蟇黃魚所化終以卵生四時常有今通呼爲鶴鶉矣番禺獅子里田野間多有鶴鶉夜則羣飛晝則草伏土人張網田中以犬驚而得之其麻翼黑爪而足高者雄也黃眼赤嘴而足卑者雌也未鬪之時出入握

之又處於囊以益其氣沃以水使壯其神將及鬪也誘以香粟拂其項毛兩兩逼促鶴鶉卽奮怒而鬪爪勾喙合灑血淋漓尙相抵觸廣人有以此爲戲者潮州人則有鬪鵝之戲鵝力鵝也重者三四十觔鬪時以咬眼爲上咬舌次之

鸚鵡

鸚鵡能言常側其胸視人似有知者性畏寒然撫摩其背則瘖觸尾則鸚須解以餘甘子尋常飼以綠荳白粳欲其喜而多語則飼以香蕉五色者能兼番漢二語澳門有西

洋鸚鵡大紅者內毳毛黃大綠者內毳毛赤每抖擻其羽則赤者爲黃綠者爲赤表裏俱變有純白者其頂黃毛上聳喜則披敷瓊州所產多紺綠羽有極細花紋此鳥行則啄地然後兩足從之

秦吉了

一名鸚鵡俗名了哥穴居嫩則口黃老則口白以眼爲別眼黃者金了白者銀了彩毛紺黑飛起則兩翼各有白羽頂有毛一縫如分髮者亦有無者午日剪舌能人言比鸚鵡尤慧鸚鵡聲若幼女吉了聲若丁男性俱畏烟粵中之

鳥也唐武后時左衛兵曹劉景陽使嶺南得秦吉了一雙
回都進雄留雌雄怨悶不食武后問之曰配爲使者所匿
后詢景陽何故匿一鳥不進景陽謝罪卽進之

百舌

俗名牛屎了樣似鸚鵡而小身畧長灰黑色微有斑點喙
亦尖黑行則俯首能反覆其舌隨百鳥之音二三月間鳴
至五月小暑則無聲故曰反舌詩云學盡百禽語終無自
已聲深山喬木裏緘口過平生

五色雀

羅浮山中產五色雀比鸚鵡而小羽儀四時鮮明一雀一
色或五色其大絳者君也朱藍相間若朝服者大臣也飛
則千百爲羣不雜他鳥而以兩鐵冠烏色者司進止同巢
共哺歲正二三月必于博羅縣城隍廟翔集一春不巢不
雛旣去他時亦不再至也

倒挂雀

雀身嫩綠色額大青胸有朱砂一點性喜香烟食之復吐
或収香于翅內頂有黃茸舞則茸開頂上香放翅中輒自
旋轉首足如環以自娛入夜必倒懸兩兩相並畜久教之

亦能言羅浮梅花村多有倒挂梅花枝上人至不去以為常一名么鳳瓊州亦有雀名為倒挂有風則倒挂樹上無風則否東莞大奚山中有吉弔雀青首翠翮其鳴兜兜出則必風高明有玄鈎雀產栗砦山中其鳴則雨廣州多麻雀羽毛斑褐嘴頷皆黑爪距黃白色躍而不走其視驚懼其目夜盲其卵斑點其性最淫食之益人又有鈎割雀四五月夜半向東飛鳴若云鈎割則年豐鈎割則年歉又有白頭雀頭有白毛五更即鳴啁哳可聽又有鳳頭雀大小毛片皆如燕惟頭作鳳冠而尾紅兒女養之馴放去一二日復來番禺有禾花雀四五月羣飛穿插田禾中土人網獲之以餽遺秋收後即無之

桐花鳳

桐花鳳丹碧成文羽毛珍異其鳥居不離桐花飲必清露楓花開則出落則藏蓋以桐花為胎以露為命者也兒女捕之飲以密水用相傳玩有曰斑鳳毛色花斑尾短身圓足脛微細似鶴鶉而絕小歲十月從羅浮飛至新安田上或至東莞茶滘人以紅絲為網見輒驚入畜久馴其疾小食惟芝蔴稗米而已儋州有金鳳大如指許身彩五色

冠首修尾儼如釵上金鳳花

鵠

一名鷓鴣一名巧婦鳥粵俗呼曰和鵠乃桃蟲所化其形小性絕精巧巢于林藪中以茅葦毛毳爲之大如雞卵緊繫樹枝雖大風雨不斷吞其卵能令婦人巧捕獲畜久可使占卦

燕

燕有三種聲多稍小者漢燕也紫胸輕小者越燕也胸斑聲大者胡燕也俱春來秋去朱才女春燕詩云簷前日煖

翩翩過簾外風輕對對斜偏是社來還社去年年不見蠟
梅花雷州西湖每夜有紫燕數萬集荷花中其謠云燕燕
燕飛入荷花尋不見荷花落盡燕無依歸去猶啣花一片
西樵山巖穴中有石燕足生翼末山人小兒羸瘦食之復
肥亦有謠云嬰兒瘦探石穀瓊南崖州海中石島有玳瑁
山其石穴皆燕所巢燕大者如鴉啖魚吐涎爲窩以備冬
月退毛所食其窩纍纍積於巖壁間島人皮衣皮冠秉炬
入穴以修竿接剗取之燕撲驚人年老力弱或致墜而死
故有多護者有空手而還者窩有黑白二色紅者難得蓋

燕屬火紅者尤其精液也或謂海濱石上有海粉積結如
苔燕啄食之吐出爲窩海粉性寒而爲燕所吞吐所煖海
粉味鹹而爲燕所吞吐則甘其形質盡化故可以開痰清
胃云○懷集邑治有燕巖其崗深廣秋月燕多歸棲其內
土人捕而乾之以售于市先父廣菴公宰懷時曾經飭禁
有示云燕巖懷邑之勝境崖常有土燕棲遲自以爲無患
與人無爭也乃有蚩蚩小民乘夜冒險梯篁炬薪掩捕殺
之鬻于市屢逐取微利夫燕靈禽也巢避戍已時辨春秋
不啄民間一粟何所見惡于人必欲戕賊其生無庸也因

圖利乎燕體不及銖兩味不適酸鹹爲利幾何且聞有徃
捕失足墜崖隕命者逐物喪軀而不知改癡愚亦已甚矣
本縣自幼博學畧識鳥鳴嘗聞其聲類多忻生而怖死茲
固欲存禽命情更急醒愚頑爲此示諭勿仍捕殺則差池
之羽下上其音優哉游哉以永朝夕民安物阜本縣實有
厚望焉

伏翼

伏翼卽蝙蝠形似鼠有薄肉翅連合四足及尾多棲山巖
石洞夏出冬藏晝伏夜飛壽千年者色純白大如鳩鵲頭

上有冠其大如鶉者色未純白亦已百歲而皆倒懸其陽
 精在腦腦重故倒懸也肇慶七星巖有五色蝙蝠生黑崗
 中游人以火入多見之從化鰲頭嶺之右有蝙蝠石石穴
 中多黃白蝙蝠有大五六尺者餘則背腹茜紅而肉翼淺
 黑棲息高樓屋簷間食蚊蚋屎名夜明砂其砂乃蚊蚋眼
 也有雙伏紅蕉花內雌雄不舍捕得其一則一不去婦人
 佩之為媚藥仁化有夜燕巖蝙蝠多至數萬旦暮分三道
 往還聲如飄風倏忽數十里羅定有催生鼠狀如兔而鼠
 首以其髯飛飛且乳聲如人呼喜食火烟能從高赴下不

能從下登高其毛可治難產亦即蝙蝠也

雛

雛似鴿青色喜食橄欖囫圇吞之肉爛乃出其核一名欖
 雛秋深自廣西來春半乃去宿則倒懸一足于樹杪弋得
 之肉厚味腴其生于檳榔林者曰檳榔雛喜食檳榔之未
 熟者性亦相類瓊歌云多謝青雛鳥檳榔要與郎寧食我
 橄欖莫食我檳榔又云青雛且莫來檳榔猶未熟莫食檳
 榔青寧食檳榔肉瓊人嗜食檳榔青故云

鵲

鵲善爲巢開戶背大歲其聲喳喳人聞其聲則喜立必順風南飛月夜東響雨晴左翼覆右翼爲雄右翼覆左爲雌嶺南惟昌化縣無之

鴉

鴉大喙白頸南人謂之鬼鵲鳴則有凶咎嶺南惟感恩縣無鴉儋州有食火鴉每啣火置人屋上以翅扇火焚起則羣鳴飛舞常爲人害州人多以食物禳之

鷗

鷗色白數百爲羣在漲海中隨潮上下常以三月風至乃

還州嶼頗知風信若羣飛至岸過瓊海者卽不敢渡

翡翠

雄赤爲翡雌縹青爲翠翼尾俱十二條以毳毛光明者爲上顏色暗者秋毛次之其大者毛充貢小者名魚翠亦名鷗大於燕尾長寸餘宿食各占磯塘自銜其毛日浴水中乃益鮮縹山翠生于黎山中茂林峻嶺人罕得見晴霽日中始一出小於魚翠五色離披人必積久探視密羅其巢如獲之又或其生子乃得楊孚異物志云山翠先高作巢及生子愛之恐墜稍下作巢生子羽毛益愛之又更下作

巢也羅浮有紅翠每更鳴震山谷日出時碧雞先鳴紅翠
鷄鷄以次相應

雞

羅浮有碧雞朱冠錦尾羣飛絕巘或獨鳴空林曰先顧先
顧每日日出則碧雞先鳴山人謂之天雞有錦雞一曰鷄鷄
卽山雞也其冠甚小背有黃赤文綠頂紅腹照水卽舞有
金雞項毛純黃身紅黃雜有文彩目微色白有竹雞褐色
斑赤文棲竹林中性好啼啼曰泥滑滑白蟻畏之性亦好
鬪有鷄雞似雉而大黃黑色有毛角如冠性愛其黨有被

侵者直往赴鬪至死不休古時虎賁所以戴鷄冠也有石
雞特小亦名潮雞潮長則鳴聲長而清有如吹角有蘆雞
生陽江山中似鵲身微赤晴呼則雨雨呼則晴有鷓鴣食
于田澤洲渚間青蒼色長頸高脚羣起飛鳴則有雨俗名
雨落母有野雞呂后名雉漢高祖改雉爲野雞其實雞類
也雄有文采而尾長雌則無文而尾短英德山人常畜之
○家雞於卦屬巽於星應昴雄者能辟邪鬼其鳴也知時
刻其棲也知陰晴其羽焚之可以致風雌雞無雄以其卵
告竈而伏出之生雞初到家以煖水洗其足放之卽不走

失云

鴿

廣人多畜鴿俱稱白鴿者鴿之大者曰地白不能天飛以
 治白蟻且又多子四十日一乳乳時雄者食米至咽米成
 漿液吐出以餵其子雌復受孕源源不絕每出殼至二三
 月則調毛四調至七調曰初旺十一二調則老調者脫其
 舊毛更生新毛也翼大毛凡十二莖翼宜與尾齊乃能高
 飛鴿之高下在眼眼有黑底天青者黑底插黃者黃油白
 氣者焦油者以此四種為上其睛清而深有重暈暈邊鉤

有血粒如石榴子則飛鴿之最聰慧者也

鵝

從化有靈鵝狀如水鵝每至夜中則鳴鄉落無更鼓夕以
 為候陽江人謂水流鵝者即淘鵝也一名鵝鵝能沉水取
 魚頭下有皮袋常盛水二升許以養魚隨水浮游每淘河
 一次可充數日食漁童謠云水流鵝莫淘河我魚少爾魚
 多竹弓欲射汝奈汝會逃何○家鵝有蒼白二色綠眼黃
 喙紅掌夜鳴應更性啖蛇及矧能制射工辟諸毒蟲

鴨

野鴨爲鳧家鴨爲鶩四會廣寧間有松鳧俱棲息松上各處池塘與江河中羣飛水面常入水取小魚白蜆食之者名爲水鴨比家鴨稍小色雜青白背頗有文短喙長尾卑脚性肥而耐寒其有冠者石首魚所化也寶鴨似水鴨而稍小頭有綠毛身有文采與鴛鴦相類鴛鴦紅頭紅掌黑翅黑尾身杏黃色有文采頭有白長毛垂之至尾又有一種琵琶鴨漁歌云琵琶州上琵琶鴨一樣鴛鴦兩樣看○家鴨雄者綠頭文翅聲瘖雌者黃頭斑色其身毛亦有純白純黑者廣州瀕海田多蟊螟歲食穀芽爲農害鴨在田

間春夏食蟊螟秋食遺稻易以肥大故鄉落間多畜鴨下海沙田畜鴨尤多然味腥不美美者山鴨南雄烟鴨特尙次則從化所產鴨雛全係焙出廣人最擅其法約以鴨卵五六百枚爲一筐妥之土罏冒以衣被環以木屑種火或猛或慢卵小温則上下其筐而更易之晝夜凡六七度至于十有一日乃登之牀牀中亦覆以衣被時旋減之滿月雛遂孳孳啄殼而出纔出殼以燒酒噴之卽能行動飲食焉



粵中見聞卷三十二

物部十二

虎

風生蟲虎為大蟲故其行必有風虎得風其威乃生從化
 山中多虎凶年尤多常緋衣幘頭盛陳儀從而出燈火煌
 煌見者以為山神也欲食人則脫幘頭緋衣復變為虎乃
 大哮吼而前高雷廉三郡亦多虎商賈遇之輒罵為大蟲
 以奪其氣羅浮山有啞虎不嘯不啞冲虛觀葛仙像旁有
 黃野人相及一蹲虎是必啞虎也山人皆云山中虎不傷

人卽或遇虎亦狎易之然山中亦自少虎也

鹿

雷州之野多鹿鹿以清明前後三日子生子生三日始開眼遇雨乃起而跑未雨雖墮地一月其脛猶軟跬步卽顛踣雷人每乘其候捕之尤喜捕鹿而取其茸鹿以一陰生爲茸可以補陰麋以一陽生爲茸可以補陽嫩茸如紫茄長三四寸鮮紅可愛然不踰時末潰而本乾剖之堅如木所謂柴茸不如四川所產茸已岐枝剖開猶柔潤也崖州曠野亦多麋鹿黎人謁官必以爲贄

麋

麋一名麋旄尾狗足社有短角黧色善跳越其行草莽惟循一徑喜食橄欖聲如破鉢每鳴則赦書至高州寶山多產其皮軟膩廣人多以作履等項甚佳一種似鹿而小曰麋黃黑色無角雄者有牙出口外秋冬居山春夏居澤獵得之以釀酒治風病諺曰秋冬食麋春夏食羊麋以釀酒羊可代糧又一種名香麋黑色常食柏葉又嗜食蛇其陰莖前皮內別有膜袋裹香至冬香滿入春滿甚便自剔去謂之麋香徐女當春時多採生香麋子以爲佩動則香氣

物部 麋

遠聞山歌云生麋香吹徭女風

狸

粵中有狸無狐雷州產香狸所觸草木生香臍可代麝亦名果狸食惟美果故肉香脆而甘其毛可為筆寫書不鈍香狸外有玉面狸白面紅爪牛尾亦食果飯則以水淘淡乃食有猫狸文如錦錢有火狸毛色如金錢豹歲久輒化為豹有藤狸生長藤間食藤實一種似狸高足而結尾名獾獾有黃白黑三種暹羅國所產尤善捕鼠澳門番人能辨之常以易廣中貨物

狨

狨一名猯以其毛柔長可緝也色純黃謂之金線狨尾絕自愛中藥箭即自齧斷其尾躑躅善緣木嗜食猴故猴最畏之

猿

梅嶺有白猿尚其猿純白常攀掛梅樹上花與猿俱白遠莫能辨行人聞有風生始知為白猿吟嘯復有緋猿善啼啼必三聲封川北三十里猿嶺多猿月白風清夜必吟嘯霧雨昏暗則否高州青山鎮其山多猿有黃緋者絕大毛

粵中見聞 勿耶狨 猿 裸然

彩殷鮮有黃色玉面者有身面俱黑者羅浮則有金絲猿
毛如織絨其啼聲絕大瓊州多猿射之跳躍四周樹杪代
樹張網乃獲之瓊州亦多猴小者曰拳猴大者曰獼猴其
頰陷能藏食尻無毛而尾短手足似人亦能豎行聲嗚嗚
若咳其性動所至林木皆振響與猿性靜不同

裸然

裸然似猴面白身黑長尾常以尾度其身以自娛自愛其
尾亦如狨狨尾較短乃以金色而溫柔不能免禍裸然尾
雖長無所用故能保全也性獨不忍傷其類獵獲其一則

族而啼殺之亦不去

熊

南熊有三種最小者曰狗熊其曰猪熊則似猪而性輕
常居山中攀援上樹見人即顛倒投地冬多入穴而藏
饑則自舐其掌至春而出其脂名熊白味美殺癆蟲塗毛
髮變黑其膽治驚癩五疳又療惡瘡久痔崇貞年間樂會
縣有猪熊無數自山中出人捕得百餘連年大旱蓋熊多
則不祥也人熊有狒狒者狀類獼猴紅髮鬚人言而鳥
音多力好笑笑則上唇覆額捕得之取其血生飲可見鬼

物又有鬻鬻俗呼為山都人面唇黑身有毛見人輒閉目
張口握手而笑人以竹筒置臂姑與之握握則必笑笑亦
如狒狒上唇覆額人因釘其唇于額格而殺之

猩猩

猩猩人面猴身一名紅人因其毛髮純紅也性機警通八
方言聲如幼女間學蟲鳥音亦曲肖最嗜酒人以酒滿注
甕中又以高屐置其旁猩猩見輒怒罵而去去而復還姑
以指染酒嘗之遂至醉着屐而笑人因縛之問曰汝飲我
酒須還我血猩猩許一升乃得其血一升不能多也以其

血染絳久而不變色此亦人熊之類

罷

熊似熊而大色黃白披髮人立力能拔樹指爪利如鋒鑽
遇虎豹樵牧皆抗其喉捏鮮血飲之脂名罷白勝于前掌
後躡焉

豺

粵無豺狼高要縣西七十五里騰豺嶺有獸似猴頭正方
髮長丈餘覆其面欲視物則搖其頭或以兩手披之上樹
甚捷故名騰豺豺形似狗前矮後高而長尾毛黃褐色其

牙如錐高要騰豹疑亦人熊也

獺

獺二種水獺名獮獺似青狐而小喙尖足駢能知水信高下為穴廣人以占水旱捕魚為食一歲兩祭魚焉山獺性淫毒以猿為雌徭女采樵歌嘯為猿聲以誘之山獺聞知即躍抱徭女因握殺之以其骨續骨有中箭毒者磨其骨敷治立消驗法婦人摩手極熱取置掌心以氣呵之即躍然而動

鼠

廣中多碩鼠狀如兔色純白人皆以為白兔也嗜食芭蕉薤菜雌者多黑褐色而小四十日一胎子產下一日即受孕廣中無兔且無白兔多以碩鼠偽為白兔以售於諸番焉有曰竹齰穴地食竹根毛鬆肉肥美亦鬆肉一二齰可盈盤色紫味如甜笋其血飲之益人

猪

粵海有泡魚大如斗身多刺化為箭猪箭在項脊間如箸白本黑端人逐之則激箭以射人婦女以金銀鑲之為簪能止頭癢除白屑又有山猪壯大多力口旁出兩牙長六

七寸甚猛利肉味美多脂以多食禾稻故也一名懶婦以
機軸織經之屬置田間則不敢近齒長輒入海化為奔鯨
狀如蛟螭而雙乳垂腹以奔鯨油為燭照飲酒則紫焰生
花照讀書則昏暗作暈箭猪以魚始山猪以魚終物之相
變如是○家猪以短喙無柔毛者良喙長則牙多而難肥
也有病割去尾尖血出即愈瘟疫以蘿蔔菜飼之或以皂
角研末吹其鼻一噴立甦

狗

韶州有赤狗穴山而居吠則不祥雷州有喙夜食尾大而
喙甚長夜從樹上取食不以晝皆山狗也澳門產狗矮而
小毛若獅子無所可用番人顧貴之無懸蹄曰狗有懸蹄
曰犬田犬長喙善獵吠犬短喙善守信信其吠聲也

羊

粵中所產羊俱食草故其肉味甚淡惟英德乳羊食仙茅
肉肥甘補益人醫書云羊食百草其毒在腦羊頭不可食
乳羊則不然羊膾而魚腥二者鮮食之則美所以魚羊為
鮮字也東南少羊而多魚邊海之民有不知羊味者西北
多羊而少魚其民亦有不知魚味二者不可得兼鮮字或

亦取此義

馬

羅定之羅鏡西寧之懷鄉產小馬高僅三尺可騎行樹下
名菓下馬多海石榴色亦曰菓騮駿者有雙脊骨能負重
凌高躡險輕疾如飛此項無種馬中偶然產之不可常得
故其價頗高也

牛

粵中多牛肇慶江中有潛牛牛身魚尾能上岸與耕牛鬪
角軟走入水既堅復出牧童歌云勿飲江流恐遇潛牛電

白有旄牛髀膝尾俱有長毛高州又有犛牛絕卑小可行
菓樹下呼爲菓下牛謠曰菓下牛菓下相逢爲儂留菓下
馬菓下相逢爲郎下雷州有爆牛其頂有骨如覆斗頸上
肉突起如駱駝日行三百餘里又有金牛色如金遇風雨
夜卽出金牛菴外踏跡于地瓊州多山牛牛兩睛紅眼上
有旋毛如四眼常百十成羣而出見人弗避瓊州又多山
馬似鹿而大千百爲羣其角內向彎而無岐眼下復有兩
眼日閉夜開以燭物其皮可爲臥具禦濕不知者皆以爲
山牛也廣州多耕牛牛眼要離角近又要眼大白脈貫瞳

子頸骨長大後腿濶厚行乃快便毛疎不耐寒毛拳曲尾
稍亂則命短牛犊腹下毛白乳紅多子乳疎黑無子一夜
下糞三堆一年生一子一夜止一堆三年生一子疫以荅
朮燒爛中牛吸其香即止牛噎用皂角末吹入

粵中見聞卷三十三

物部十三

龍

南海龍之都會新安龍穴洲每風雨即有龍起去地不數
丈朱鬣金鱗兩目燁燁若電人與龍相視久之弗畏也其
精華在浮沫時噴薄如雨是為龍涎承取稍緩則入地中
或謂龍涎多積于海上枯木如鳥遺狀其色青黎其薌腥
雜百和焚之翠烟千結蜿蜒蟠空經時不散可剪分香縷
然多不正惟從番舶來者出大秦波斯國於雨中焚之焔

爆有聲則正蓋龍乃純陽之精故其氣絕香龍又屬木木之氣得太陽多者必香諸香所以龍涎爲最也嘉靖十七年七月朔日會同裏洞村忽見田中風號水噴烟騰飛蜚萬千俄過山嘴田禾如故旋復下田聲勢愈烈飛草颺坭雷聲微吼與勢交振陰雲黓黓下際未幾田中寂然仰見一龍半身及尾數丈翱翔空中因改裏洞村爲起龍村又二十四年六月二十五日東潭一物隆起噴水自蔽在田者見其首尾鱗角盤旋久之後有一龍自潭口逆而上垂尾相曳以升偃木覆舟無數海中常苦龍氣每過輒嘔吸

舟船人物而去置之他所然亦無恙海舶舵師知龍氣起卽插金鼓或燒鬻殼諸臭物或灑青礬却之海濱多高樓須置兵器其上免爲所掣蓋龍性畏鐵也羅浮山多龍潭有人戲投巨石巖中左右砰擊龍驚爲雷卽時白氣四起雨點如盤盂龍與雷同類雷出則龍出山澤相通新興天露山其頂有潭歲旱以石投之聲震如雷卽雨又有井干湖其深莫測歲旱以土培擊之卽有雨同是驚龍之意龍聽以角謂之鼈虫故善驚○茂名靈湫山有一龍井晉時潘茂名真人以金鑄五龍納井中自永嘉至今每遇旱高

涼太守出五金龍祭之雨立至萬曆間有太守竊去其一
行至中途金龍飛入于水今止存四然大旱時汲龍湫之
水以禱亦得雨不必定出金龍云

龍蝦

龍蝦巨者重七八觔頭大徑尺狀如龍彩色光耀有兩大
鬚如指長三四尺其肉味甜稍粗于常蝦以殼作燈光赤
如血珀曰龍蝦燈東莞新安潮州多有之其次曰蟬蝦產
鹹水中大者長五六寸出水則死漁人以絲粘網其深四
尺五寸長六尺仄立海中絲柔而輕寧蝦至則鬚尾穿罟

弗能脫也兩兩乾之爲對蝦以充上饌鮮者肉肥白而甘
其次曰黃蝦白蝦沙蝦最小者銀蝦狀如繡針以紵布爲
網網大一丈二尺以二層咸繫之口向上流取蝦卵及禾
虫俱如是銀蝦稍大者出新安銅鼓角海名銅鼓蝦以鹽
藏之味亦美蝦醬則尚香山蝦其出新寧大襟海上下二
川者亦香而細頭尾與鬚皆紅白身黑眼初醃時每蝦百
觔用鹽三觔封定缸口俟蝦身潰爛乃加鹽至四十觔於
是味大佳可以久食一種名蝦春粵方言凡禽魚卵皆曰
春蝦春非蝦之卵也江中有水蠃大僅如荳其卵散布取

之不窮新會產者卵稍粗味更好燒之通紅紅則鮮明多
脂適口次則番禺深井江勒酒所產村落間或醃成入糟
終歲食焉丹蝦產惠州西湖其色青煮熟丹紅絕甘美諺
云湖上漁家白飯丹蝦白飯者水晶魚也長不盈寸大不
過分其色瑳潔無乙有丙八九月有之○天蝦色白狀如
蛺蝶四五月從空飛入水化而為虫黃魚食之而肥名黃
魚虫漁人取其未化者炙食之云味甘美或以為蝦所化
自天而來故曰天蝦○蝦母塊然如破絮黑色有口無目
常有蝦隨之食其涎沫如子母然此物生海中以鹹水之

渣滓為母又名水母鮮煮食之輒消釋出水乾者曰海蜇
腹下有脚紛紜名曰蜇花八月間乾者肉厚而脆尤美又
有曰蝦姑者一名海馬俗謂水蜘蛛主催生燒服亦治夜遺

鱧

粵中鱧各種有曰白鱧多涎沫以產池塘中烏耳者為佳
有曰黃鱧黃質黑章亦多涎沫大小不等小者佳有坭鰍
長二三寸無鱗以涎沫自染三物皆喜伏水土之下味甘
可以滋陰與患痰火者相宜但須夜以火照之在缸中騰
而搶火火輒滅者噴火蛇也額下有細鱗數片食之殺人

又夜以火照見其全身浮于缸中水面頸下有白點亦不可食諺曰魚浮鱧沉沉者滋陰雖則滋陰其毒亦深言鱧蛇難辨也另一種鰻鱺冬時穴熱乃出名走風鱧背有肉鬣連尾無鱗口有舌大者長數尺有黃脈綿紋者曰金絲鰻鱺善攻江岸性大毒功專殺虫去風其骨燒烟熏蚊可絕薰氈絨及屋舍竹木皆斷蛀虫也

魚花

粵中自封川江口至羚羊峽口皆有魚花步步皆有餉魚花戶承之歲納于朝南海九江村人多以縵魚花爲業凡

縵魚花以苧布爲層層尾爲一木筐而無底半浮水上魚花從層入至筐乃杓于船中層之狀如複斗帳凡兩重外重疎以布四十丈內重密以布一丈爲之歲當魚汕種時雄擦雌腹則卵出于藻荇間雄出其腹中之護覆之卵乃出子若見電則子不出也魚花戶自三月至于八月大步置筐八九十小步置筐十或二十在於江水灣環之所上步取已又於下步取之盛以白磁方微末如針已辨爲某魚棟爲一族其浮而在盤上者鰾也在中者鰾在下者鰾最下則鯰也分養池中水淺而向陽則易長稍長曰葦鱧

謂可以食葦草也常當日落時望某方電脚高則知某方無雨某江之水不長某方電脚低則知某方有雨某方之水長長則某魚花至矣西南爲南寧左江其水多土鯰正西爲柳州右江其水多鱧鯨西北爲桂林府江其水多鰻魚花以此四種爲正畜於池易長故務取之他魚花則弗取也歲正二月始鬻魚花水陸分行鬻于近者魚花大遠者小日以米湯和鴨子黃飼之又數易以生水用船載者則船旁爲兩水車晝夜轉水使新水入船舊水不留而後魚花不病也楚省雖有魚花率取粵產以其易長魚亦難

僞楚魚胞一重而直粵魚胞兩重上大而下小以此爲辨也北江多石灰水魚花食之不肥取之又不易畜諺曰北江魚種讓西江凡池塘一畝大約畜鰻三十鰻一百二十鰻五十土鯰千日投草三十餘觔鰻食之鱧鯨不食或食草之膠液或鰻之糞亦可肥也鰻通作鮠有烏白二種烏者食水蛭螺蜥白者食草其美皆在頭諺曰鮠魚頭鯉魚尾鯉魚之腹甘且旨又曰水鯰土鯰病人宜食鯰浮鯰沉可以滋陰蓋鯰屬土其性沉長潛水中鯰屬水其性浮長躍水上鯉鯽二花溪澗池塘各處有之外有金魚者分鯉

魚中見聞 魚部 三
鯽二種春深咬子咬子謂雄咬雌眼子則出腹宜亟取之
否則雌還食之或不食其子着葦藻間遇雷雨輒隨電光
而去子初出色黑由黑而紅而黃則純金矣以鬣小三尾
五尾者爲貴謂之蝦尾蝦尾又以撒開似木芙蓉花者爲
貴焉又有錦鱗魚大可二指長寸許身有橫理十二道鱗
如錯錦具五色金彩縷縷以盤缸畜之日午投花一二瓣
爭覆花陰不得者忿而相鬪鬪罷復比目而遊二種乃魚
之可玩者也○前朝弘治年間蛋戶流亡課米無抵總制
劉大夏疏請將西江兩岸河阜上自封川下至都含召九

江鄉民承爲魚阜分別水勢上者納銀五錢下者納二錢
五分貯肇慶府庫給帖照船撈魚永著令典後總制凌雲
翼蕩平瀧東西兩山復開羅旁并都含下各處魚阜歲餉
約有千金所謂魚阜者魚花步也歲清明後雷雨大作魚
孕育乘潦流下其花柳慶爲上南寧次之鬱桂又次之富
賀又次之夜分西望電光卽知魚花來自何江至以何日
柳慶越三旬兩旬南寧則兩旬旬半或電光遠則知過阡
門不來魚花入塘養至下年春月乃分往各處然大半售
在龍川往多傾費不往則有餘魚故諺有曰龍川不可往

輿中見聞
物音
羴魚不可養也

鱓龍魚

鱓龍多產端州以春時出浮陽見日則眩漁者輒於陽處取之有甲無鱗魚之至貴者也端州又產嘉魚以孟冬天大霧始出出必於端溪高峽間其性潔不入濁流常居石巖食苔飲乳以自養霜寒江清乃出穴噓吸雪水蜀中丙穴嘉魚畏寒喜熱故以三月出穴十月入穴粵中大小湘峽嘉魚畏熱喜寒故以十月出穴三月入穴也四會烏龍潭其底石隙中產有柔鱗肥甲如水晶者土人亦謂之嘉

魚蓋四會爲西北二江所滙地多白蕩或端州嘉魚其種至此而變也

鮠魚

鮠魚身扁色白肉內多刺腹中卵細其肪在鱗鱗不可破破則脂流味減鮠亦自惜其鱗一絲罾網卽不動腹下有三角硬鱗廣人謂之三鰲相傳鱠白所變鱠白於春鮠於夏其味皆美鱠白陽江最多鮠魚則獨尙順德甘竹灘所產諺曰甘灘最好是鮠魚海目山前味不如海目南海九江堡江中山也

鱸魚

鱸魚巨口細鱗至夏益肥冬初由江入海趨鹹水以就煖夏初由海入江趨淡水以就涼味甘美曝乾尤香海豐有鮓魚似鱸肉鬆少刺味亦甘惟不及鱸另一種鮓魚一名鱚狀似青魚其卵滿腹有黃脂味最美以孟夏出至冬益肥諺所謂寒鱚熱鱸也

黃白花魚

白花魚鹹淡之水俱有春曰黃花秋曰石首惟大澳乃有大澳者鹹水之邊也十月十一月日昃盡浮出水漁者聽

其聲穉則未出大澳聲老乃出大澳嘯子然後於大澳日暮取之諺曰黃白二花味勝南嘉諸魚皆屬火惟二花不然味甘而補益魚故莫美于二花也

鰈魚

鰈魚一邊青綠一邊白一眼在青綠邊亦有兩眼合而為一者身扁喜貼沙上常以口吹沙又名貼沙肉甘美一脊骨外無別刺骨三水滄江多產漁人先一夕以細釣放江中次日收釣取之

鱸魚

魚類
物音
魚
鯪魚圓頭縮尾狹鱗肉厚而細一脊骨外其刺大小骨皆
脆美新安人每以奉客味甘以平食之肥健益氣一名鏡
魚以其圓也德慶州羅旁水口產有鯪魚圓如葵扇名葵
鯪肉雖粗味亦美

竹魚

北江滇陽峽下產一種竹魚似鮭色如竹葉青翠鱗下多
朱點以盛夏出味絕甘美獨無大至十觔者魚之最小而
美者有曰鱮魚春時自巖穴中出狀似初化魚苗宜乾之
食以薑醋有曰銀魚以秋九月出共出于惠州西湖之第

一橋者長二黍餘光滑無鱗表裏明徹煮以湖上清醒泉
及姚坑水有味無渣但希貴弗可多得有曰鵝毛魚取者
不以罟網乘夜張燈火艇中鵝毛魚見火輒上艇須臾而
滿其氣味絕香一名香魚惠潮高廉俱有之

墨魚

墨魚狀似皮囊口在腹下八足聚生口旁背有骨隆起厚
四五分輕虛而白肚內有水黑如墨可以書字逾年即滅
止存空紙能吸波喫墨水以自衛廉海多產另有鰕魚亦
相類潮州產有章魚亦八足一名章舉三魚形狀俱與衆

魚異亦無甚大其味皆美乾之以充上饌

魴魚

魴有犁頭魴劍魴斑點魴虎鹿鋸魴各種背鬣而腹翅大者丈餘皮有沙圓細如珠可以治木發光潤海水將潮天將雨毛皆起濕雖千里外不爽一名潮鯉腹中有兩洞以貯水養子子必二皆從胎生朝出暮則入臍其肉淡而鬆以其翅作銀絲菜稱珍品

鮭魚

鮭魚鱠白皆以仲春出大者重數十觔入自大洋望之如

黑雲至虎門則鮭魚之穉者多變為鮭漁者輒合圍取之此魚放卵時其雄為雌含卵口中卵不散故類繁歲中大至時其下堆積無數以一鎗刺一魚取之次魚飲其血復上復鎗刺取之如是者相連不斷不可勝取故鮭魚時節土人饜飫多糟之以週歲食焉

河豚魚

河豚自番禺菱塘以至虎頭門六七十里所產獨小色黃而味甘少毒與別產大而板牙色白者異以火燔刺以沸湯沃涎浣至再三雜肥肉烹之皮骨脫落乃可食入秋尤

宜多食益胃煖人最益產婦其美在肝取之以秋潮初盛
垂千百鈎于網中河豚性嗔觸網輒不去欲與網故往往
中鈎又或以生鈎取之但所取者河豚多雌雌孕子味不
美惟南亭海心岡撒網取者河豚多雄其味絕美也

蒲魚

蒲魚卽鱒也又名少陽魚狀如盤無足無鱗背青腹白口
在腹下眼在額上尾長有刺螫人肉內有骨節節相比脆
軟可食韓昌黎詠蒲魚詩云蒲魚尾如蛇口眼不相營其
南食三曰蒲魚也

黃雀魚

惠州多產黃雀魚八月化爲黃雀十月後復化爲魚更迭
而化不知其始魚終雀始雀終魚化於魚抑或化於雀也
雷州有秋風鳥亦魚之所化化必以八月望前五日從風
而起自南至北中秋後卽無之此則不復化爲魚者乎又
有海鯉歲二八月羣至沙洲移時化爲火鳩海人譟而驚
之有未全化者鳥首而魚身焉此則欲化而不得也海人
亦獨何心顧使其欲化不得乎哉

飛魚

海南多飛魚吳都賦云文鮪夜飛而觸綸漁父說文鮪飛魚有兩翅飛疾如鳥觸綸輒有光射潮夜見漁火爭投船上烹而食之味甚美

鮫鯉

鮫鯉頭似鼠背似鯉胸腹有毛口無齒尖喙長舌尾與身等有四足能陸能水絕有氣力能穿山而行一名穿山甲蓋陸之魚也治病能穿經絡入達營分取用尾甲三棱功力尤勝方書云穿山甲王不留行婦人食之乳長流王不留行草藥名也

粵中見聞卷三十四

物部十四

龜

龜性神靈體靜息伏為介蟲之長種類亦有不同韶州產毛龜大如錢以水養之其毛披放色碧綠置之几案可以辟蠅欽州產六眼龜龜本兩眼有四點金黃花紋圓長中黑與其兩眼排比有似六眼雷州有卜龜俯行者靈文昌縣北石井中有紅白二龜旱禱之紅出則兩白出則晴惠州有巨龜背生樹木望之如洲渚然不常見也

玳瑁

玳瑁廉瓊二州俱產性最靈雌雄不交相視而卵夜伏沙汀注目上視與月爭光月之精華因入焉而為文介漁人見之覆其背即不能去沙磨其背文采益明自脊兩分得十四板以厚而黃多有物形者為貴捕得時倒懸之潑以滾醋其甲逐片自落生取其甲佩之遇有蠱毒甲自搖動亦靈物也一種名脊麟其甲有膜一層以火焙之可坼而起似玳瑁而質薄廣人飾器物多是用此另一種鱗螭山龜也巧匠以其甲黃明無黑暈者煮而拍之陷黑玳瑁狀

甚明蟾

鼈

鼈與龜同類俗名脚魚無耳以目為聽純雌無雄水居陸上夏月孕乳其抱以影性畏蚊遇蚊叮即死熏蚊用鼈甲燒烟蚊即遁物之相報如此白者療痰火有謠云烏耳鱗白脚魚滋陰降火只須臾

鱟

鱟者候也善候風諸水族亦候之而出故曰鱟大者尺餘其甲青綠眼在背口藏在腹尾三稜長一二尺其血碧色

食必以其血同煮味乃美卵滿腹中出而爲蠶十僅其二
餘多爲蠨爲蟬蝦及諸魚族蓋蠶乃魚蝦之母也性喜羣
遊雌常負雄于背背有骨如扇作兩截常張以爲帆乘風
而行漁人每望其帆取之持其雄則雌不去持其雌而雄
脫去亦不獨活也取之多於夜介類屬離離爲火夜間蠶
解緣行沙坦一一俱有火花海族多生于鹹鹹火之渣滓
也捕得其雙者乃可食單者及身小名鬼蠶者與尾有鋸
刺者皆不可食

弔

弔介之屬也產瓊州海口港中蛇頭鼉身水宿不棲其膏
甚輕利貯以銅瓦皆滲出惟雞卵殼盛之則不漏以治諸
腫毒功同熊膽

蠨

蠨善候潮潮欲來舉二螯仰而迎之潮欲退折六跪俯而
送之潮長則蠨少消則蠨多蠨乘潮乾多從稻田求食其
行有跡跡之得其穴一穴止一蠨其匡初蛻柔弱如綿絮
通體脂凝紅黃雜糅結爲石榴子粒四角充滿手觸不濡
是爲更蠨其未蛻者曰膏蠨蓋蠨應月盈虧爲月之精所

注故以膏為美次者肉蟹水淡產蟹多肉水鹹產蟹多膏
 蟹總以爽者為美其字從解言以甲解而美也甲解者蛻
 也蛻則爽蛻必以秋大抵潮減則蟹肥每月初九二十三
 兩日潮必乾甚潮乾而蟹食坭則肥潮滿而蟹食水則瘠
 又蟹一月一解自十八以後月黑蟹乘暗出取食食至初
 二三而肥肥則殼解月皎蟹不敢出則瘠矣然蟹率以秋
 深而肥以盛寒而肥盛寒時白蜆子肥故蟹食之而肥又
 蟹產于流水則色黃而腥產于止水則色紺而馨得白芷
 則黃不散得葱及五味子同煮則色不變蟹類甚多有曰

小娘蟹其螯長倍于身青綠如錦新安人賤之止熟其螯
 以待客有曰擁劍蟹五色相錯螯長如擁劍新安人名曰
 進劍待客以為敬有飛蟹小者如錢大者倍之以螯為翼
 飛騰海面網得之味勝常蟹此三者蟹之異也○羅浮山
 阿耨池有仙蟹大如錢色深紅明瑩如琥珀大小數十羣
 行見人弗畏以阿耨池養之可經數月養以他水則不活
 其蟹更異

蟹

蟹似蟹而小春正二月南風起海中無霧則公蟹出

夏四五月大禾既蒔則母蟊出其白者曰白蟊以鹽酒醃之置茶蘼花朵其中晒以烈日甚香稱珍品生毛者曰毛蟊有毒多食發吐痢常以糞田飼鴨惟潮人則當園蔬無日不食以毛蟊入鹽水中經兩月熬水爲液投以柑皮去其渣滓用其精華諺曰潮食蛎及鹹解解者解去其渣滓也蛎與蛤同類蛎嘴尖一名青蛎性寒治疔瘦除癆熱廣州人止食蛤不食蛎惟潮人食之蛎又有一種生海坭中長二三寸大如指兩頭各有兩岐以其狀怪又曰蛎氣味甘溫能去胸中煩悶蛤一名曰雞廣州池塘

基畔田澤俱產味甘性溫益人最犯瘡疥春出冬藏三月三日農人以其聲卜水旱聲小水小聲大水大諺曰田雞聲啞田好稻把田雞聲響田好蕩漿唐詩云田家無五行水旱卜鼃聲鼃卽蛤也又田雞上晝鳴上鄉熟下晝鳴下鄉熟終日鳴上下鄉俱熟

羸

羸種最多以香羸爲上潮州產有大羸其殼雌雄異聲可應軍中之用珠羸出東莞大步海名其地曰婚川都人曰珠羸戶有銀母羸狀若蚌內多小珠又曰珠母其殼厚而

瑩可以截鑲器皿其肉最珍而性寒有指甲羸一名石蚶
味甘美虛損人以米酒同煮最補益有馬甲柱形如指甲
羸殼薄肉少味頗清羅浮有神仙羸尾尖俱破味甚甘有
寄生羸生鹹水者離水一日卽死生淡水者可久畜殼五
色如鈿或赤如丹砂其蟲如蠃有螯足或以金銀爲殼稍
炙其尾卽出投金銀殼中海人名爲借屋有共命羸卽瓊
瑁也瓊瑁狀似珠蚌殼青黑色長寸許大者二三寸生白
沙中不污坭淖物之最潔者有兩肉柱能長短腹中有數
白蠃子如榆莢常從其口出爲之取食瓊瑁清潔不食食

在蠃子而飽在瓊瑁故名共命羸另一種海鏡殼圓肉甚
瑩潔腹中亦有小紅蠃子曰蚌孳爲之取食一名石鏡陽
江有紅羸殼黑而肉微紅味甚甘生海中千百成羣若蜂
房相結海人鈎取其一則千百羣起是年地震則不生廣
州水田中產一種羸其殼文左旋其肉霽隨月盈虧純乎
得太陰之清氣者也

蠃

蠃生于江中坭澁者殼黑生于沙坦者殼黃遇風雨輒能
飛老則肉出小蛾而蠃死小蛾復散卵水上而爲蠃蛋人

粵中見聞
物志
五三
耙取煮之出其肉以售于市其美可以解蠱乾之持以遠
行不合水者宜之有先達都憲何公諱經者罷官家居偶
思食蜺鬻蜺者適過門公探囊中無錢其夫人曰何不書
清字買取何都憲大笑而止至今嘖嘖稱道焉又傳宋帝
昺幸韋涌時食蜺而美之曰惜不令其無耳至今帝泊舟
處蜺皆無耳甘美異常進蜺蛋人配祀將作大匠梁公廟
中稱蜺子丈人云白蜺另是一種番禺海中有白蜺塘白
獅子塔至西江口二百餘里皆產白蜺歲二三月南風起
天煖白霧瀰空輒有白蜺子飛落微細如塵然落田輒死

落海中得鹹潮之力乃生生以春之南霧熟以冬之南風
皆宜暄暖若天盛寒則瘦又雷多則蜺子亦瘦蜺子蓋風
之族宜風而不宜雷風之南者生物故又宜南風也南風
之起舊蜺子未盡新蜺子又積其上不可勝取過春則化
爲坭滓番禺菱塘沙灣二都江水中積厚至數十丈是曰
蜺塘取之如坭沙量之以舸牒以食以糞田以壅蔗以飼
鴨其利頗大自冬至春淘者鬻者多有之

蚌

蚌川澤江海俱產大者長六七寸小者長三四寸老亦有

珠但與珠蚌迥異珠蚌殼厚此殼甚薄此珠色暗不
珠光瑩也肉甘微鹹性冷食之止渴除熱凡兩殼相合
而長者皆曰蚌廣而圓者皆曰蛤有蛤蜊產海濱白殼紫
唇大二三寸肉入食饌殼火煨作粉入醫藥治痰能降能
消能潤能燥有車螯似蛤蜊而大其殼紫色璀璨如玉斑
點如花海人以火炙之則殼開取肉以供饌其殼可飾器
物燒赤醋淬二次研末醋調敷癰腫毒又治酒積癖塊皆
鹹能軟堅也或云車螯是海中大蛤能生珠亦能吐氣爲
樓臺又有淡菜似珠蚌一頭小中啣細毛肉甘美而淡能

補益人生海藻上

蠮

蠮如蜆而大聞雷則生沿海沙坦皆有以天寒而肥仲秋
孕者肚黑廣人以肉白者爲尙冬月漁人以足採取謂之
踢蠮番禺市底之南春初取小蠮畜之至冬乃取田蠮田
田在鹹海中亦曰蠮塘猶夫白蜆之塘也惠潮多蚶田蚶
與沙蛸與蠮皆味甘性溫益人蚶從甘不用調和自然甜
美愈大愈嫩一名花蠮沙白似蠮而大殼光滑黃白色但
不可以畜故無沙蛸田

蠔

蠔鹹水結成塊礪相連如房蔓延數十丈潮長則房開取食潮消則房合自固鑿之一房一肉色白而含綠粉味甘美殼燒灰名牡蠣粉以其殼壘墻高亦不搖殼中有一片瑩滑而圓曰蠔光以砌窗櫺雨洗益白小者名珍珠蠔中常有珠東莞新安有蠔田與龍穴洲相近以石燒紅散投之蠔生其上取石得蠔仍燒紅石投海中歲凡兩投兩取蠔本寒物得火氣其味益甘謂之種蠔蠔生附石投石各有疆界謂之蠔田蠔本無田田在水中以生蠔之所謂之

田猶以生蜆之所謂之塘也彼處婦女皆能打蠔有打蠔歌云一歲蠔田兩種蠔蠔田片片在波濤蠔生往往因陽火壘得成山幾丈高又歌云冬月珍珠蠔更多漁姑爭唱打蠔歌紛紛龍穴洲邊去半濕雲鬢為海波打蠔之具以木整成上字上挂一筐婦女以一足踏橫木一足踏坭手扶直木稍推即動鑿蠔得肉置筐中潮長乃返橫木長尺餘直木高數尺此古坭行踏橈之遺也香山無蠔田蠔生海旁石壁水乾以草焚燒蠔爆開而取其肉甚甘美番禺菱塘亦多蠔近海恒多佳品其海濱有山曰石蠣甚高大

古時蠨生其上今掘地至二三尺即得蠨殼多不可窺居人墻屋率以蠨殼為之一望皓然

粵中見聞卷三十五

物部十五

蠶

廣蠶歲七熟閏則八熟自三月至九月每月一熟以二十
二日為度立春桑穀生蠶駒始出蠶本龍精而首類馬與
馬同神故不曰蠶虯而曰蠶駒也蠶駒既出以桑芽餵之
二眠三眠食葉漸有聲至四眠而蠶熟矣凡蠶三日一蛻
蛻則不食是謂一眠眠至四而繭成然眠必要齊眠是曰
大眠若九眠有一不眠則俱敗正月繭既成名為大蠶大

蠶歲一熟熟至八日而出蛾配其雌雄又至八月而蛾卵
 卵則蛾死以紙裹卵藏之至立春蠶駒復出故曰大蠶其
 二蠶三蠶曰小蠶亦曰連蠶言相連月月熟也大蠶繭四
 千小者六千可獲絲一觔大蠶絲光滑勝于細小者計一
 婦歲治蠶可得絲四十餘觔凡桑葉一月一摘計地一畝
 每月可得桑葉五百觔蠶食之可得絲四觔坡山之絲線
 良龍江之線綢良然龍江蠶種皆購于九江而為線為綢
 特良則水土使之然也另有一種名天蠶出陽江其食必
 樟楓葉歲三月熟採得以醋浸之抽絲長七八尺色如金

堅韌異常以作蒲葵扇邊緣用又有沙柳蟲腹中絲亦可
 作緣

蝶

羅浮胡蝶尚有大胡蝶常止花樹開見人弗動動亦依依
 不遠採者連花枝持出輒飛復故處其生以繭繭中有一
 卵小於雞子重胎沁紫包以烏柏葉絡以絲絲山中人常
 以冬月往採有購藏之者次年二月以繭挂梧柳間輒有
 大胡蝶飛來展翅就繭不飲不食抱伏七日繭破子出雌
 雄成對無一孤者大可五六寸許其繭破不使人見相傳

麻姑遺衣所化以花為糧雌雄不離千里外必相尋覓留雌則雄不去留雄則雌去復來廣州春夏之交市中亦有賣之

蟬

羅浮東峯下有石崙崙中楓樹千萬株常有蜩蟬數百種數里間鳴則俱鳴止則齊止無一參差斷續又有鳴鳥和之聲若木魚以為節有綠金蟬一名金花蟲背正綠如金貼有翅生甲內喜藏朱槿花中一一相交人取帶之夫婦相婚

蠶蜂

陽春有蠶蜂常附橄欖而生雖有頭足與木葉無別必候木葉凋落乃得之土人以置篋笥每遇蠱毒必鳴鳴則自呼又以其聲之清濁卜禍福粵中不獨以雞卜且以蠶蜂卜焉

蜜

韶韶陽春俱多山蜜往往為房於巖石間其所釀糖霜後割之白如脂味勝家蜜家蜜取糖以夏冬為上秋次之春易發酸冬日梅花糖最甘香山蜜多泛溢於草間石隙露

積日久必宿蛇蝎之毒食之有霍亂以死者究不若家養者良新興薑蜜尤忌食之

蠹

桂蠹者桂樹蠹也其大如指生於桂而還食桂色紫而香辛色紫則桂花所爲香辛則桂葉所爲以蜜漬之古爲珍味趙陀曾以桂蠹五器獻漢文帝云又露花中蠹亦大如指其色白熟則化爲飛蛾乘未化取之炮炙充盤味甚甘二蠹皆入饌外有木内生而嚙木心其聲入夜尤甚木旣穿穴雨後化爲天牛飛滿屋中兩角而黑背有黃白烏雷

人謂之木蠹卽孟子書云蠹也

禾蟲

夏暑雨禾中蒸鬱而生蟲蟲白稻根出稻根色黃禾蟲乃稻根所化故色黃大者如筋長至丈節節有口生青黃熟紅黃霜降前禾熟則蟲亦熟以初一二及十五六乘大潮斷節而出浮游田上撈取之得醋則白漿自出以白米泔瀹過蒸爲膏甘美益人蓋得稻之精華者也其醃而藏之則貧民所食或作貨售之捕者以巨口狹尾之網繫于杙逆流迎之網尻有囊囊重則傾瀉於舟杙之所在江兩岸

其名曰阜與魯門蜺塘皆附近土豪利其利云

白蠟蟲

蟲大如蟻虱芒種後粵人取其苞置于菁紬樹上其樹類冬青蟲食樹汁吐沫粘嫩枝上化為白脂至秋採之以水煮鎔濾成蠟文理瑩徹若白膏作貨售之以入藥與燒燭用此蟲嫩時白色作蠟及老則赤黑其結苞于樹枝初如黍米入春漸長如雞頭子大紫赤纍纍抱枝似樹之結實是曰蠟種亦曰蠟子子內有白卵每苞數百次年立夏以箬葉包之繫于樹上芒種後苞拆白卵化蟲乃復上樹作

蠟也黃蠟成于蜜蜂白蠟成于此蟲白蠟惟瓊州最多諺

曰東家白蠟蟲西家黃蜜蜂養蜂得糖食養蟲得燭紅

蚊

蚊多生於腐葉爛灰及陰濕地或臭溝沙蟲所化粵中有蚊母鳥似鴉而大有黃白雜文吐納皆蚊又有蚊母草蚊自其花實中出有蚊母木粵人謂之柁不花而實實從皮中迸出如綴珠璫色赤味酢煮為饌食之遲則化蛾亦有為蚊又從化有樹實如枇杷將熟則殼中飛出蠖子又榕子中多有數小蚊亦皆蚊母木也蚊母木與夜蘭相反夜

蘭木高尺許葉如槐花如小粟至夜則芳香如蘭折之插門上則蚊不敢入一名蚊驚樹人有雜病取其葉生啖或煎水飲之卽吐痰而愈葉上有篆文如符又名神符樹

蟻

廣中蟻冬夏不絕山中有黃赤大蟻其巢結竹木間可容數千種植家囑山人採之買置樹頭以竹枝引度樹樹相通斯花菓不爲蟲蝕又一種白蟻以卑濕而生凡物皆食雖金銀至堅亦食惟不食鐵力木與櫟木耳然金銀雖食以其渣滓煎之復爲金銀蓋金銀之性不變也潮州大馬

蟻山有蟻祖廟歲五月羣蟻來朝謠云馬蟻山頭馬蟻朝年年五月趁江潮蟻祖者乃生蟻之神土人以蟻害稼故賽於蟻祖祈除其害如詩所云去其螟螣及其蝻賊無害我田穉之意焉

蟋蟀

蟋蟀一名促織生于草中者力弱生于石隙竹根者堅老善鬪總以東莞所產爲最東莞地名花溪銀塘乃熊公飛與元人大戰之所又東莞伯何真羅中丞亨信彭中丞誼陳少保策墓上產者往往無敵蓋五公勇烈絕人皆戰功

其精氣及於昆蟲歷久不磨鬪蟋蟀者歲於此間捕取有
立於蛇頭者身紅而大尤惡

螂蛆

螂蛆生土石間及人家墻隙中節節有足一名百足足赤
腹黃有雙鬚尾岐螫人最毒春出冬藏性畏雞人見百足
亟喚雞百足輒僵或觸飲食誤吞之令人腹痛欲死飲燒
酒或雞肉羹可解螫人疼痛雞冠血搽之即安又畏蜘蛛
能制蛇毒山行筒置百足蛇不敢近喜嗅龍腥天將雨爭
就最高處蓋聞龍腥故也廣中多螂蛆絕無蠍

蜚

蜚有三種山蜚草蜚水蜚生深山樹葉中青色名飛蜚聞
聲輒飛集人耳後刺血始如針飽則如指拔去稍遲即深
入人肉中山行以木樵子或蒜或薑汁或茶子末塗身則
飛蜚不敢近生草陂者色黃有狗鼻指者生陰濕處好入
大豕鼻中吮血或亦入人鼻血出不止口含嚴醋塞兩耳
低頭此物即出被刺人不可拔重力拍之自墮生水者
一名螞黃其色黃褐間黑紋數道兩頭啞人肌血雖烈火
煨研成末入水變生誤吞腹中噉食臟血黃瘦腹痛速以

田中坭研水飲數升可解或以蜜糖解之有一種沙蝨生
 水中大如蟻喜入人皮膚以茅根竹葉刮之或以苦荳汁
 塗之可愈或以火炙身亦隨火而去又有一種飛蛟生于
 瘴霧三足無身呼吸間入人肺腑則漸減食而死或入于
 牛馬魚腹中人食之亦病幾死但徭黎中乃有之瓊州有
 蛇蠱似蜘蛛而足短最毒人誤以為蜘蛛遂受其傷害

蛤蚧

雄曰蛤雌曰蚧雄口大身小皮粗尾粗雌口尖身大皮細
 尾小俱四足有毛背綠色有黃斑點若古錦自旦至暮常

變十二樣色鳴常自呼其名一歲則鳴一聲羅浮山中有
 鳴至數十聲者多居古木竅間出入必雙鳴亦雌雄相應
 捕得其雌雄合者益陽一名吉度蛇

蛇

蛇之類甚衆中其毒者以蛇藥敷之即愈凡有蛇之所即
 有蛇藥見有蛇藥即知有毒蛇在左右不可踐履蛇每遺
 精草上及飲行潦之水而留涎沫行者宜擇地而蹈擇泉
 而飲忽焉腫痛如蛇蟠狀是中其毒求蛇藥不得亟以酒
 和熊膽服之亦可愈諸山崗多蛇有曰烏梢者野遇之殺

傷不死能尾其人至家以報之以釀酒可治瘡疥有曰量
人者長五寸許見人卽標起欲高過人有曰藤蛇善附物
裊裊如藤見者以爲藤也遂爲所中有曰山鳥蠶一名飛
梢頭如鳥聲如馬嘶逐物身則騰起惟尾著地有曰土錦
將生子必當大道俟人擊之腹破子始出否則其子食母
而出故粵人稱不孝者曰土錦蛇有曰斷草烏亦蛇也大
僅指許長五六寸頭似龍形而小身絕黑其行也百草沾
之立斷人見輒跡取之以酒煮食愈大痲瘋其蛇離地丈
許身如箭直標入穴不沾草因而難得此皆毒蛇之異者

也其無毒而異者曰時辰蛇狀如蜥蜴十二時轉十二色
曰猫蛇其聲如猫曰雷公馬產雷州可食蛇有一字名二
字名三字名者三字名如筍箕筴金角帶七寸錦過樹榕
之類

蚺蛇

崖州多蚺蛇新官至黎人輒以蚺蛇爲獻其長至丈巨盈
尺口無齒尾有鈎其行慢其身斑文秋時眼矇而伏春暖
乃能屈伸土人采野外葛藤寒入穴中蛇嗅之卽靡衆發
穴殺之肉極腴美皮可冒鼓及飾刀劍樂器其大者長十

餘丈黎人捕之滿頭插花蛇注視不動或以婦人衲衣投之輒聞氣蟠伏衆逼而斷其首待其騰躍半日乃斃有水旱二膽其膽如鴨子大狹長通黑皮膜極薄甜之味苦微甜剔些須着清水中浮游水上迴旋走動爲正若多着亦沉能退目醫疔疔積成癆甚驗又治跌撲杖打血悶垂死有功肉治癘風殺三蟲辟瘟瘴疔辟邪殺鬼佩之吉祥

粵中見聞附紀

安南

帝顓頊時南至于交阯莫不砥屬帝堯時申命羲叔宅南交周成王時交阯南有越裳氏重三譯而來朝越裳卽九真也秦以交阯隸象郡漢初屬南越武帝平之置交阯九真日南三郡兼置交阯刺史光武中興交阯九真置守教其耕種制爲冠履始知婚娶漸立學校建武十六年交阯女王徵側反伏波將軍馬援沿海而進斬徵側徵貳立銅柱爲界漢獻帝建安中改爲交州孫權分交州爲廣州而

徙交州治龍編唐初改安南都護府屬嶺南道安南之名
 自唐始明洪武初歸附賜安南國王印其王姓陳後為權
 臣黎季犛所篡永樂發兵討平悉置郡縣甫定而黎利復
 叛宣德初年遣使謝罪遂宥而封之其國城郭不完兵止
 徒卒器僅交鎗恃所乘象若聞叢雷大砲即奔崩矣其俗
 不知禮義權髻剪髮好浴善水平居不冠食飯曰噉音官話恩
 咁飲茶曰汪午飲酒曰汪了着衫曰默襖其地東西相距
 一千七百六十里南北相距二千八百里計其為府十七
 為州四十七為縣一百五十七歲入司農一千三百六十

餘萬舉滇黔閩廣之賦不足以當之其土產銀條金銀器
 皿沉速各香象牙犀角珊瑚丹砂綾絹刀扇等項俗稱富
 庶明代棄若弁髦嘉靖中黎莫變生廷議征討吾粵先哲
 霍文敏議遣大司馬按兵境上詔諭交人以郡歸者授之
 郡以州歸者授之州使其自為守若廣西之土官然可不
 血刃而定湛文簡權論亦如此而竟不行誠可惜也出廣
 東入交趾海道自欽州南大海揚帆一日至西南岸即交
 趾潮陽鎮又自廉州冠山前海發舟北風順利一二日可
 抵交趾海東府若沿海岸而行則烏雷嶺一日至白龍尾

又二日至玉山門又一日至萬寧州又二日至廟山又三日可抵交趾海東府自欽州天涯駟經貓兒港由萬寧州抵交趾國城陸路止二百九十一里又欽州城下登舟兩日至涌淪自涌淪至防城陸路一十五里防城有廉州府同知龍門協左營一守備駐劄防城水路三日可至交趾萬寧州管下之江坪防城水路兩日可至欽州管下如昔司巡檢所轄之東興街今東興街有欽州州刊與龍門協左營一千總駐劄東興街至江坪陸路止五十里隔一小河耳江坪各省商賈輻輳多有婚娶安居者計欽州東興

街至安南國城海道約六七日陸路約一十一二日也由廣西入交趾分三路自憑祥州入者出鎮南關一日至文淵州自思明府入丘溫者過摩天嶺一日至思陵州自龍州入者一日至平而隘由雲南入交趾元時始開兩路自蒙自縣入經蓮花灘以抵交趾之石瀧自河陽隘入循洮江左岸十日至交趾平原皆山徑難行明英國公張輔發兵憑祥黔國公沐晟發兵蒙自不循馬伏波故道夾攻取勝此奇兵也古時南蠻多以銅爲兵器馬伏波旣平交趾盡收其兵器鑄爲銅柱銅鼓銅船等物以鎮南邦欽州之

西分茅嶺有兩銅柱大二尺餘以表漢界銘曰銅柱折交
趾滅交人怖畏設守銅柱數家歲以土培之僅露數尺又
欽州之北有銅魚爲竇其山因名銅魚又鑄銅船五以其
四征蠻留一于合浦北湖中每陰晦卽見銅船浮出湖面
又鑄銅鼓數百徧藏于山川瘴險間至今人皆敬畏西屠
則祭銅柱合浦則祀銅湖威靈千古如一日也


占城

占城古越裳界秦屬象郡爲林邑縣漢改象林縣屬日南
郡唐改占城今仍之其地北接安南東西距五百里南北

距千里或云延袤三千里國城離海一百二十里去日南
界四十餘里其郎湖蒲口角秦象郡城猶存南去二百餘
里舊有西屠彘亦稱馬伏波因植二銅柱以表漢界伏波
北還留兵十餘家居壽冷岸南面對銅柱卽馬流人也銅
柱山周十里形如椅蓋兩跨重巖東臨大海山川移易惟
馬流人能識其處占城之先本林邑一縣漢末有區連者
據縣稱王連死外孫范逸代立逸死范文篡位攻并旁國
及日南郡文死子佛立猶屯日南晉九真太守灌遂率兵
討佛走之追至林邑時五月立表測日日在表北影在表

南九十一分郡名曰南蓋始于此後隋文帝乃遣行軍總管劉方擊敗其王范志入其都護金鑄主像一十八蓋有國十八代矣永樂元年占城王占巴的賴始貢正統六年遣使立占城王十二月東莞發舟次日過烏猪洋又次日過七洲洋望見銅鼓山次日至獨猪洋望見大洲山次日至交阯洋次日至占城外羅洋校杯墅口卽是占城嘉靖二十一年使至其國臘月猶暑士着苧衣民多裸袒南陌稻熟北秧猶青俗尙腦垂髮髻胸纏氍布粒食佳稻肉食水兕山羊出入乘象乘馬土產象牙犀角孔雀尾伽備龍

稻降檀速柏諸香花梨烏蘇各木紅油圓璧烏白等布巾帕被縵種種方物離廣州二千五百里離瓊崖僅六百里每南風順崖州聞占城雞聲如洪鐘遠遠而來云





中見聞

牝音

其

天保癸巳



